

開放文學 – 神鬼仙俠 – 天妃娘娘傳 第二十六回 天妃媽上表謝恩

林真人自收服毛公之後，朝廷遣使敕封建廟。落成之日，境內大小神祇，無不到壇拜賀，附近四海龍王，各命駕獻珍。真人禮遇已畢，當堂上召遣四員天將，鎮守四境及廟庭，親赴玉京謝恩。時八月十五早，舉朝文武，表賀聖壽。鴻臚卿傳唱隨班上表，宰臣驗封。見有一表，背書「福建福州湄洲林天妃謹封緘奏上」。宰相即將此表奏上，曰：「今早當聖壽，萬國稱賀之表，臣得一百三十道，外多一道，臣觀其緘，乃福建林天妃之表，想聖上日者傳旨褒封，而今日故來上表謝恩矣。」明帝即命宰臣啟緘讀之，表云：伏以皇帝陛下，道合太清，功參造化。體乾元而撫運，禮樂征伐，操自出之大權；秉離照以當天，文武聖神，運無方之妙用。雲行雨施，仁恩普被於遐荒，獸舞鳳儀，謨烈重光於累葉。百靈協應，政致治於無虞；四夷咸服，每蓄威於不戰。豈茲番寇，犯我邊疆。赫怒出師，投蝟毛於燎火；成行對壘，折螳臂於抗輪。計實出廟廊，恩乃及僻壤。命臣鼎建，策使馳封。乃瓊宮流響，仙韶引五鳳之嘯鳴；紺宇生輝，寶炬作九龍之旋繞。何以當此，豈敢忘茲，伏願和氣與虞薰具集，而歡聲將岳贊交騰。敬進烈文之惠祉，小裨天保之休徵。不勝激切屏營之至，謹奉表稱謝以聞。

宰相讀罷，明帝即下寶位，設香案殿前，當天拜囑曰：「頃者西陲告捷，是天哀小子而賜之天妃也。傳旨宣封，聊效寸衷之萬一，復賜表章，何重勞仙駕哉？調和陰政，佐國庇民，朕不聰，實於天妃有望焉。」祝罷，率朝臣一齊禮拜，恍惚之間，如在其上，如在其左右。明帝謂群臣曰：「陰陽之理，故不可誣，第未聞有英靈若此之天妃也。所謂鬼神之為德，其盛矣乎！乃誠之不可掩也，亶其此乎！」乃命群臣於京師中立廟，命其額曰：天妃行台。